

那文毅公奏議

那文毅公二任直隸總督奏議卷六十九目錄

卷六十九

搜捕盜源

附議改罪名

酌裁捕盜兵弁改加快役

那文毅公二任直隸總督奏議卷六十九

男容安恭輯

搜弭盜源 附議改罪名 酌裁捕盜兵弁改加快役

謹按道光六年正月二十八日奏內

奏臣自抵任以來於地方事務如水利旗租諸大端

業經前督臣蔣攸銓查辦清理周詳妥協臣實有

不及之處請其舊規可以久治惟臣此次來直節

據各屬稟報竊盜案件頗多查蔣攸銓任內極力

查拏訪獲盜窩而此風尚未歛息現在據報各案

非結夥竊劫卽臨時行強迨經獲犯究詰輒以同

案夥黨係屬道途偶遇各訴貧窮因而起意追其
所得贓物或俵分無幾或已交同夥售銷並未入
手浮滑供詞各案如出一轍竊思竊盜罪犯法律
綦嚴雖在愚民無不知曉卽或一時因貧起意何
能以此等大干法紀之事謀諸素不相識之人况
爲盜亦非軟弱之人所能豈有素不知其能否相
從遽敢邀之入夥且竊盜意在得贓既已行劫入
手又豈肯轉付素不相識之人不卽瓜分之理惟
求其故顯有窩藏巨贓尋常秦養盜後分贓此等
必當搜拏靜盪方不負其任其一方之
窩聚日久勢必由大而分小小者又大又分漸至

殊

布滿道路公然橫行久之出有爲首之人乃成大
患若不亟除奸藪斷難清絕盜源臣現已嚴飭各
屬設法查拏並派委捕盜員弁分赴四路密行躡
訪務將積年窩頓弋獲淨盡方足以絕根株而安
閭里第臣才識短淺自慚無能時時愧辜

高厚尙求

皇上隨時隨事

訓誨頻加俾得有所祇遵則感激

聖慈益無涯涘謹

奏奉

殊批所奏均悉

道光六年二月初九日

奏爲酌定盜賊窩主加重治罪專條以戢奸宄而安
良善事竊照盜賊最爲閭閻之害而窩家尤爲盜
賊之源直隸界連東豫匪徒出沒無常臣到任以
來時以緝匪安良爲念惟披閱卷牘各屬竊劫之
案層見疊出當經通飭各屬實力緝捕並將查辦
情形奏蒙

聖鑒在案臣思盜賊之敢於肆行無忌必有窩頓之家
而窩家之敢於藏匿必有兵役包庇如果地方官

實心查訪勤於緝捕包庇則從嚴懲治窩家則必破其巢匪徒自無所匿跡無如各州縣有能於捕務者往往吝惜捕費因循從事無能者卽不惜費亦不能收緝捕之效何況再加以漫不經心甚至規避處分強者報竊竊者不報是以鄰境拏獲人犯往往查無報案似此疲玩成習無惟盜風不息至於兵役額支工食無多出外躡緝全藉官發盤纏獲犯到案又圖按名獎賞今官惜小費獲犯並不爲功不獲犯亦不爲過賞罰不明勤惰不分則不如包庇賊匪轉可從中分肥卽使破案到官亦

必多方迴護又何樂而不爲於是兵役包庇窩家
窩家藏匿賊匪狐鼠同眠固結而不能破案久之
賊勢強橫甚至不畏兵役拒捕逞兇無所不至此
等匪類日聚日多若不亟爲翦除日後必致釀成
巨案臣現復專派幹員分赴各屬實心訪緝以期
有犯必獲並嚴飭各州縣嚴查兵役勤惰有無獲
犯信賞以勸之必罰以懲之使君輩有所戒畏咸
知激發天良安心供役倘再吝惜捕費稍有泄視
以致仍有包庇之事卽當從嚴叅辦不敢稍爲姑
息然嚴禁窩主固在地方官賞罰嚴明而窩賊分

贓情尤可惡必須嚴治竊主之罪查例載窩藏強盜二名以上竊盜五名以上俱發近邊充軍又窩留積匪果有造意同行分贓代賣發極邊烟瘴充軍其未經造意同行但經窩留分得些微財物或止代爲賣贓者均減本犯一等治罪又嘉慶二十三年山東省因窩竊之風日甚經撫臣和舜武奏准嗣後山東一省窩竊三名以上坐地分贓及代變贓物者發近邊充軍五名以上者發雲貴兩廣極邊烟瘴充軍地保及在官人役有窩贓分贓者悉照捕役聚賊例辦理等語是定例窩藏強盜必

須二名以上竊盜必須五名以上窩留積匪必須
造意同行分贓代賣方擬軍戎若窩盜不及名數
窩留積匪並無造意同行者即可從輕發落則到
案止於少供人數便可末減一犯再犯故智習成
卽山東省辦理窩竊之案亦必須窩留三名以上
方擬附近充軍而兵役包庇一層亦未議及直隸
爲

畿輔重地較之山東尤爲緊要現在盜案甚多必須
嚴定科條應請嗣後直隸一省除強盜窩主造意
同行照律問擬斬決外其窩藏強盜一名者發近

邊充軍二名以上者發新疆給官兵爲奴窩藏竊盜一二名者杖一百徒三年三名以上者發極邊充軍五名以上者發雲貴兩廣極邊烟瘴充軍窩留積匪無論有無造意但經容留分贓代賣者卽發極邊烟瘴充軍兵丁及各項在官人役如有窩賊分贓及包庇者卽照捕役聚竊例發雲貴兩廣極邊烟瘴地方充軍窩留強盜及包庇者發新疆給官兵爲奴俟數年後盜風稍息再行奏明復歸舊例如此酌定專條從嚴懲治使奸匪知所畏懼不敢仍前窩盜窩旣除則盜自靖而良可安矣

臣

爲因時懲創起見是否有當伏候

訓示謹

奏奉

硃批刑部議奏

道光六年五月初一日

奏爲直省竊盜日多請嚴治罪之例以靖盜源而安
閭閻事竊照直省界連豫東幅幘遼濶犬牙相錯
匪徒本易出沒近來各屬報竊之案尤多於往日
屢經臣嚴飭各屬實力緝捕並將盜賊窩主加重
治罪奏蒙

允准在案惟查無業遊民始則因貧而竊繼則相習爲常甚至由竊而搶由搶而劫恣意橫行無所不至若不嚴加懲治無以靖絕盜源查初犯再犯之賊以及因竊擬徒限滿釋回復竊計贓計次按例未及遣戍者仍係從一科斷其罪不過杖枷若輩頑劣性成旋釋旋復爲盜是以各屬被獲賊犯半多舊匪此其明證臣與藩臬兩司公同商酌欲消桀驁之氣必施折磨之方伏查四川省於嘉慶十六年間因絡匪及無籍棍徒攜帶刀械嚇詐行竊奏請繫帶鐵桿奉

旨允行近見江蘇省亦因淮徐一帶匪徒藐法奏奉
諭旨仿照辦理直隸爲

畿輔重地賊匪漸多橫惡情形相類尤宜援照懲辦
以挽頽風應請嗣後尋常竊盜除計贓計次罪應
軍遣流徒仍依各本例問擬外其初犯行竊不及
四次再犯行竊不及三次罪止杖枷訊無結夥攜
帶兇器刀械亦照例定擬如有糾夥四名以下并
帶器械者均於所犯本罪之外酌加枷號一箇月
至初犯行竊四次以上再犯行竊三次以上結夥
已有四名並持有兇器刀械計贓科罪亦止杖枷

者一經拏獲於責刺後加繫帶鐵桿一枝以四十
觔爲度定限一年釋放其因竊擬徒限滿釋放回復
行犯竊罪止杖枷無論次數並有無結夥搗械於
責刺後如繫帶鐵桿一枝定限二年釋放倘仍不
知悛改滋生事端再繫一年加限滿釋放後仍復
犯案卽加重嚴辦如此酌量懲治庶宵小咸知儆
畏似亦戢匪安良之一道是否有當伏候

訓示謹

奏

道光六年五月初六日奉

上諭那彥成奏請嚴竊盜治罪之例一摺直隸界連豫東幅幘遼澗匪徒出沒近來各屬報竊之案日多甚至搶劫橫行且有犯竊疑徒限滿釋回旋復爲盜被獲半多舊匪該督請援照四川綰匪江蘇徐淮匪徒之例分別懲治以挽頽風著照所請嗣後直省除尋常竊盜計贓計次罪應軍遣流徒仍各依本例問擬外其行竊初犯不及四次再犯不及三次罪止杖枷訊無結夥攜帶兇器刀械仍著照例定擬如有糾夥四名以下並帶器械者均於所犯本罪之外著加枷號一箇月至行竊初犯四次以上再犯三次以上結

夥已有四名並持兇器刀械計贓科罪亦止杖枷者
於責刺後著加繫帶鐵桿一枝以四十觔爲度定限
一年釋放其因竊擬徒限滿釋回復犯罪至杖枷無
論次數並有無結夥搆械於責刺後著加繫帶鐵桿
一枝定限二年釋放倘仍不知悛改滋生事端再繫
一年如限滿釋放後仍復犯案卽著加重嚴辦此係
因時制宜量加懲創俾宵小咸知儆畏如此後盜風
稍熄該督察看情形奏請仍照舊例辦理該部知道
道光六年七月初八日

奏爲委員緝獲首夥盜犯現在提省訊究請

旨勅部將同案夥犯解直歸案審辦事竊據房山縣知縣金鼎梅稟報縣屬顧冊村義盛布店於本年五月二十四日夜被盜持械嚇禁拒傷事主劫去銀錢布疋又安家莊事主張勇家於六月初三日夜被盜持械入室劫去衣物等情當經臣勒限嚴飭該管文武上緊躡緝并檄委正定府同知羅秉寅涿州營守備楊銘帶領弁捕改裝查拏旋據該委員會同各地方官先後緝獲盜犯丁三卽丁倉兒胡誠得卽胡大辛二卽王二等三名逐加研訊據胡誠得辛二供稱行劫顧冊村布店及安家莊張

勇家等案均係丁三起意糾合于三張黑兒張甲
卽張洛賈山東王二楊二並該犯等夥同前往搶
劫銀錢布疋衣飾等物俵分各散現在于三等逃
往何處不知去向質之丁三旋認旋翻供詞狡展
經臣行司飭提犯卷來省委員逐細審究一面嚴
飭該地方官迅速訪拏逸盜去後旋閱邸抄知步
軍統領衙門拏獲盜犯梁黑兒等五名奏交刑部
審訊復經臣飛飭房山縣查明是否案內夥犯旋
據稟稱現奉部行訊明梁黑兒張洛賈二犯實係
行劫該縣顧冊村布店安家莊張勇家等案內盜

犯其劉洛順係屬窩主劉六王三係寄存贓物并與梁黑兒等同行之人并經該縣訊之現犯胡誠得等據供張洛賈卽係案內張甲梁黑兒是否張黑兒須俟見面方可辨認等情臣查此案盜犯膽敢糾夥持械肆意行劫必有積久巨窩分贓藏匿且恐平日夥黨亦不止此數人現在同案逸盜究俱潛匿何所此外有無窩夥搶劫另案亟應逐細根究按名緝拏查案內首夥盜犯丁三等本係直隸委員營縣緝獲在先前因犯供發猾已將一應犯卷行提來省正在嚴切審究因案未審定尙未

具奏現在既據步軍統領衙門獲有夥犯相應請
旨勅部即將梁黑兒張洛賈劉洛順劉六王三等五犯
解交來直歸案以便提同現審各犯質訊確情並
根究窩家逸盜一有供出卽就近密拏不致聞風
遠颺庶辦理益歸嚴速謹

奏

道光六年七月十一日奉

上諭那彥成奏請將同案夥犯解赴直隸審辦一摺前
據步軍統領衙門拏獲盜犯梁黑兒等五名當交刑
部審訊茲據該督奏稱此案首夥盜犯丁三等先經

直隸委員緝獲必須與梁黑兒等當面質認明確方能定案著刑部卽將梁黑兒張洛賈劉洛順劉六王三等五犯解交直隸歸案審辦

道光六年十二月十八日

奏爲拏獲盜犯審擬具奏事竊查房山縣稟報縣屬顧冊村義盛布店並安家莊民人張勇家被盜劫去銀錢等物拏獲丁三胡誠得辛二等一案因犯供狡展案內夥犯梁黑兒等已經步軍統領拏獲奏交刑部審辦經臣繕摺奏

聞奉

旨將劉黑兒張洛賈劉洛順劉六王三等五犯並經刑
部將續獲王黑兒閻二王二劉宣等四犯連起獲
原贓一併解直行司飭發保定府審辦去後茲據
保定府知府金洙審明定擬由司覆審招解前來
茲_臣親提研鞫緣梁黑兒籍隸蠡縣與現獲之王
黑兒胡誠得辛二劉宣未獲之計三苑和尚山東
王二楊二王五並于三之兄于二已獲脫逃之張
洛賈均素相識認丁三籍隸良鄉縣與計三素好
與梁黑兒等先不認識胡誠得先經行竊犯案經
涿州審擬杖責刺臂詳結道光五年十二月間梁

黑兒赴京尋工託劉宣之父劉洛順找尋住處劉洛順卽領至伊婿王二並呂三所住之興隆寺內同居嗣王黑兒張洛賈先後進京亦在興隆寺借宿一兩日王二等均不知梁黑兒係屬匪人梁黑兒旋與劉宣出京在各處做短工度日六年三月間梁黑兒因貧難度起意行竊劉宣允從復轉邀王五入夥是月初九日二更時分同夥三人徒手偕至安州陶口村事主鄭清平家門首梁黑兒撥開街門與劉宣王五進院竊得銀馬分牽至涿州松蘿店集上賣與經紀馮二及該處不知姓名寺

僧共得大錢九十一千文均分各散馮二等均不知竊情五月二十三日梁黑兒走至房山縣顧冊村與王黑兒辛二計三苑和尚山東王二楊二張洛賈先後會遇梁黑兒起意行竊王黑兒等允從是夜二更同夥八人各攜木棍偕至房山縣吉陽村事主趙維新家牆外計三張洛賈扒牆進院梁黑兒等在外接贓計三等竊出炕墊衣被等物交梁黑兒等分攜至村外查點俵分辛二卽各自走回計三因天亮尙早見村內事主陳士常家並無街門起意復竊梁黑兒等允從同夥七人同至陳

士常家一齊進院梁黑兒苑和尚楊二在院內接
賊王黑兒掇開屋門與計三王二張洛賈進屋竊
出衣被鐵鋤等物被事主陳士常驚覺持鋤出捕
毆打梁黑兒左胳膊一下梁黑兒拳毆事主陳士
常胳膊並未成傷陳士常復舉鋤追毆梁黑兒奪
獲鐵鋤與王黑兒等分攜贓物逃至莊外俵分五
月二十四日計三稔知顧冊村事主李阜源義盛
布店有錢起意行劫糾邀梁黑兒王黑兒苑和尚
王二楊二張洛賈等入夥梁黑兒等允從後復更
餘時分同夥七人分攜木棍軟梯借至事主李阜

源布店門首見鋪門虛掩適有鋪夥二人開門出
外梁黑兒王黑兒在外把風計三苑和尚王二楊
二張洛賈乘隙閃進鋪內王二楊二在櫃臺外等
候苑和尚進內用棍打碎燈臺截傷鋪夥張程文
胎膊手腕事主不敢聲張計三與張洛賈苑和尚
踢開櫃房門撬落櫃鎖劫得銀錢布疋同王二等
攜至村外查點俵分各散是月不記日期丁三行
至房山縣聞知張勇帶同流娼至安家莊居住前
往嫖宿數次嗣因無錢娼婦相待冷落心生氣忿
往找計三告述情由囑其邀人折毀娼窩洩忿六

月初三日午後計三與梁黑兒胡誠得辛二楊二
于二張洛賈在京外漫頭村先後會遇計三轉述
前情邀同梁黑兒等前赴良鄉縣寶店與丁三會
面各通姓名丁三攜帶順刀鐵錘計三梁黑兒楊
二于二張洛賈各攜木棍胡誠得辛二徒手同夥
八人日西時分由丁三家起身偕至張勇家門首
時已二更計三掇開梢門同丁三等進院見二門
關閉計三張洛賈踰牆進內開啟二門丁三在門
外把守梁黑兒等一齊進內時西廂房內有一不
識姓名住客出院查看被計三張洛賈上前細住

隨後復有一人走出亦被梁黑兒于二綑縛計三
聲言張勇家財來歷不正卽與梁黑兒等同進西
屋搶檢衣飾綢緞等物同丁三等分攜逃至漫地
查點分別存留當錢俵分而散經事主趙維新李
阜源張勇報經房山縣勘訊差緝張勇因係娼家
恐勘驗敗露於具呈後挈眷潛逃梁黑兒王黑兒
張洛賈逃至京城卽被番役拏獲同贓物送步軍
統領衙門訊供

奏交刑部審辦而夥犯丁三胡誠得辛二亦先後被
房山縣會同委員拏獲訊供起贓因丁三供詞狡

展稟經臣提省審訊奏奉

諭旨將夥犯梁黑兒等八犯並續獲夥賊劉宣一名同起獲原賊解直張洛賈遞至拱極營地方乘間脫逃經良鄉縣具稟飭緝嗣步軍統領續獲王二呂三房山縣續獲與胡誠得等素識之楊明德一併解省歸案審辦因各供有與京訊原供互異詰據各犯僉稱從前或因到案心慌錯記混供或係隨意編造信口搪抵惟丁三一犯堅不供吐飭據房山縣將丁三同居族孫丁羣傳解來省審訊據丁羣供稱四年六月初四日伊見丁三屋內放有長

袖裕馬褂等物詢問來歷據丁三告知因安家莊
窩娼之張勇家相待冷淡糾邀七人搶來分得等
語核與梁黑兒等供均吻合復提丁三連日質訊
該犯惟稱只求治罪該府因全案人證俱已供明
未便因丁三一犯狡供不吐遂爾延案按照察證
確鑿之例擬議由臬司覆審轉解到臣提訊之下
各供前情如繪惟丁三仍無一語加以刑嚇亦矢
口不承推其居心顯爲狡展延案之計自應卽據
衆供定案查律載強盜已行而但得財者不分首
從皆斬又例載盜劫之案督撫嚴行究審將法所

難宥及情有可原者一一分晰於疏內聲明大學士會同三法司詳議將法所難宥者正法情有可原者發遣又兇徒因事聚眾執持兇器圍繞房屋搶掠家財徒罪以上者不分首從發邊遠充軍又律載搶奪財物計贓重者加竊盜罪二等又竊盜贓八十兩杖九十徒二年半九十兩杖一百徒三年各等語此案梁黑兒等夥同逸犯計三等劫搶事主李阜源等家各案贓有起獲且所供劫搶年月日期及上盜情形核與報案相符其爲各案正犯無疑梁黑兒王黑兒二犯聽從逸盜計三豫謀

強劫事主李阜源家分得贓物自應按律問擬梁
黑兒王黑兒除因竊護賊拒捕等各輕罪不議外
均合依強盜已行而但得財者不分首從皆斬律
擬斬立決該二犯訊係在外把風聽從行劫均止
一次係屬情有可原惟該犯等係同時解直僉稱
逸犯計三糾邀強劫苑和尚等入室搜贖難保無
串捏避就情事除王黑兒監斃外應將梁黑兒一
犯照例監候俟緝獲逸犯計三等到案再行質訊
辦理丁三因挾張勇家娼妓相待冷落之嫌輒轉
向計三告述糾邀梁黑兒等八人執持兇器前往

細縛搶掠財物殊屬不法張勇窩頓流娼固與平民有間惟丁三曾在彼嫖宿計三等均係賊匪是以罪人搶掠有罪之家卽與搶掠凡人者無異所搶贓物共值銀八十餘兩按搶奪計贓加等律均犯該徒罪以上自應按例問擬丁三胡誠得辛二均合依兇徒因事聚衆執持兇器圍繞房屋搶掠家財徒罪以上不分首從發邊遠充軍例應發邊遠充軍至配所杖一百折責安置劉宜聽從梁黑兒行竊事主鄭清平家計贓值銀九十餘兩應合依竊盜贓九十兩杖一百徒三年爲從減一等律

杖九十徒二年半至配所折責三十五板仍繫帶
鐵桿俟限滿開釋遞籍劉洛順不能禁約其子劉
宣爲匪復冒昧引領梁黑兒與伊婿王二同住亦
屬不合應與不知竊情冒昧收受梁黑兒竊贓抵
銷欠賬之劉六均照不應重律杖八十折責三十
板閤二王三王玉兒楊明德王二呂三丁羣訊無
知情窩留分贓情事均無庸議仍與劉洛順劉六
分別遞回原籍查明如無爲匪不法卽取保管束
已獲各贓給主認領無主之贓照例變價入官冊
報未獲各贓同當本錢文在於各該犯名下照追

分別給主還商逸犯計三等並逃犯張洛賈嚴緝
獲日另結至房山縣事主李阜源布店被劫一案
首夥盜犯八名陳士常家被賊護賊拒捕一案首
夥賊犯七名今兩案內均僅護梁黑兒王黑兒二
名獲犯尚未及半且係他人捕得仍應照例開叅
供招咨部并飭取職名另行補叅謹

奏奉

硃批刑部議奏

謹案道光七年閏五月十七日

奏報行劫房山縣事主李阜源布舖案內在逃之夥

盜張洛賈一名據順天府緝獲

奏交直隸歸案審辦訊供屬實將張洛賈依強盜已
行得財例擬斬立決入

奏奉

硃批刑部速議具奏

道光六年九月二十五日

奏爲遵

旨審明定擬事竊據永清縣審解盜犯劉兌兒等聽從

逸犯徐二行竊事主趙元方家臨時行強並夥犯
霍二在南路廳越獄脫逃一案經順天府尹將管

獄官南路廳司獄陳景先奏參奉

旨南路廳司獄監內疎防盜犯霍二越獄脫逃該司獄
陳景先並不小心防範著先行革去頂戴勒限緝拏
倘限滿無獲卽行革職南路廳同知楊本濬未能先
行覺察著交部議處並著直隸總督查照順天府原
咨飭提案內刑禁人等嚴審有無知情賄縱情弊按
律定擬具奏欽此當經行司飭提犯卷來省飭發委
員保定府審辦去後茲據該府金淦審明擬議由
司覆審解勘前來臣親提研鞫緣劉兌兒籍隸霸
州與已獲之永清縣人楊二幅山東德平縣人王

五已獲脫逃之文安縣人霍二未獲之山東陵縣人徐二霸州人李瞎印並不知籍貫人馬輩兒互相認識均非善類劉兌兒先因三犯竊盜被霸州拏獲擬流脫逃被獲擬軍遇

赦釋同行竊永清縣事主邱大禮家布疋犯案杖責楊二幅亦因犯竊擬流脫逃被南路廳獲解順天府擬軍援

赦釋同王五先於道光四年聽從張可榮行竊固安縣事主姚元德等家麥子等物犯案審擬杖刺復於五年五月初七日獨竊新城縣事主苑希舜家牛

隻道光五年五月二十八日劉兌兒王五霍二徐
二李瞎印馬輩兒在固安縣先後撞遇各道貧難
李瞎印起意行竊劉兌兒等允從卽於是夜同夥
六人李瞎印攜帶鐵鎗頭餘俱空手偕至事主趙
宗泗元興當舖房後李瞎印用鎗頭挖窟徐二進
內竊得衣服遞交劉兌兒等分攜當賣得錢花用
六月初八日劉兌兒等六人復在永清縣四聖口
村先後與楊二幅會遇楊二幅卽邀劉兌兒等至
三里口村外空廟住歇劉兌兒挽令楊二幅煮飯
同食徐二適由水窖村外經過見有一家籬笆門

牆想係豐裕之家起意行竊楊二幅答稱此係趙元芳家可以偷竊旋即回家並未同行是夜馬輩兒攜帶繩鞭餘俱徒手走至大劉家莊事主張起家門外徐二卽扒牆進院開啟大門劉兌兒同霍二進內竊得驢兩頭而出三更時分同至水窖村事主趙元芳家籬笆門外王五李瞎印在外看守賊驢徐二撥開籬笆門與劉兌兒霍二馬輩兒進院經趙元芳知覺喊嚷王五李瞎印聞聲卽將先竊賊驢牽走徐二起意行強拾取院內所放樹根砸窗入室劫得被褥由窗撩出劉兌兒接賊逃逸

徐二開啟屋門轉至屋內拉出驢頭交霍二牽走
被事主趙元芳攔擋馬輩兒將趙元芳拉出屋門
按倒在地用拳毆傷右乳抓傷左眉右手腕左乳
並擦傷右肩甲右手腕徐二復搜得衣服綿被同
馬輩兒跑回廟內馬輩兒向劉兌兒等告知按毆
事主情由查點贓物依分並送給楊二幅藍布綿
被布褂等件未向告知強情復將先後所竊驢頭
賣錢分用旋經事主鳴地報縣勘驗訊估通詳緝
獲劉兌兒關提王五霍二並拘楊二幅到案起贓
給領詳批緝審嗣經該署縣毛占樞因查逸盜徐

二等弋獲無期查驗趙元芳傷已平復提訊霍二
畏刑妄認進屋牽驢先同現犯劉兌兒等分別擬
以斬決軍徒解廳提訊因霍二供詞翻異詳委固
安縣龍載恬會同毛占樞審晰前情將劉兌兒霍
二仍依強盜已行得財律擬斬聲明均係在院接
贓情有可原楊二幅王五仍分別擬以軍徒於道
光六年五月二十五日復解到廳該廳楊本濬未
及提訊詎霍二卽於是夜乘禁卒人等睡熟搥斷
鐐鐐扳折籠柱越牆逃跑報經該廳勘訊詳經順
天府府尹奏奉

諭旨交

臣

審辦遵卽提犯研鞫據供前情不諱誠恐該

犯劉兌兒等尙有夥劫重案及楊二幅有供謀行
劫同行上盜並禁卒人等有鬆放刑具受賄縱放
各情事嚴詰不移案無遁飾查律載共謀爲竊臨
時行強以臨時主意及共爲強盜者不分首從論
又強盜已行但得財者不分首從皆斬又例載盜
劫之案各督撫嚴行究審將法所難宥及情有可
原者一一分晰於疏內聲明大學士會同三法司
詳議將法所難宥者正法情有可原者發遣新疆
給官兵爲奴又道光六年奏准新例內載窩藏竊

盜五名以上者發雲貴兩廣極邊烟瘴充軍又例
載竊盜賊九十兩杖一百徒三年又例載搶竊拒
捕等案正犯在逃未獲現獲之犯稱逃者爲首如
現獲多於逸犯供證確鑿以及現獲之犯係先後
拏獲經隔別嚴訊實係逃者爲首卽依律先決從
罪毋庸監候待質又監犯越獄如獄卒果係依法
看守一時疎忽偶致脫逃並無賄縱情弊者依律
減囚罪二等治罪各等語此案劉兌兒聽從逸盜
徐二行竊事主趙元芳家徐二起意行強馬輩兒
按毆事主劫得驢頭衣服被褥賊有起獲給主認

領正盜無疑徐二馬輩兒未經獲案第現獲之劉
兌兒王五及已獲解審脫逃之霍二均係先後關
獲業經隔別研鞫實係逃者爲首自應照例先決
從罪劉兌兒除行竊計贓輕罪不議外合依強盜
已行而但得財者不分首從皆斬律擬斬立決該
犯聽從行劫僅止一次在院接贓係屬情有可原
應請於疏後聲明聽候會議楊二幅先因犯竊擬
流在逃行竊擬軍援釋後復敢邀留賊犯劉二等
六人在伊村空廟住歇事後分贓卽與窩家無異
雖訊無造意共謀同行上盜亦應按照新例問擬

楊二幅合依窩藏竊盜五名以土發雲貴兩廣極邊烟瘴充軍例發雲貴兩廣極邊烟瘴充軍例發雲貴兩廣極邊烟瘴充軍係

赦後復犯例應加等毋庸以足四千里爲限至配所杖一百折責安置王五聽從行竊趙元芳家係在外看守賊驢不知強情白應仍按竊盜本律科斷其所竊各案惟聽從李瞻印行竊趙宗泗元興當衣物計贓九十兩零爲重合依竊盜贓九十兩杖一百徒三年爲從減一等律應杖九十徒二年半至配所折責三十五板禁卒陳銓等訊係依法看守並無賄縱情弊惟監獄重地疎於防範致令盜犯

免脫自應擬照本犯之罪減等問擬查盜犯霍二業據固安縣會同永清縣訊明並無入室搜贓其行劫亦止一次應照情有可原罪止擬遣陳銓王玉祥魏鳳池均合依監犯越獄獄卒依法看守偶致脫逃並無賄縱情弊依律減囚犯二等例應請於霍二遣罪上減二等各杖九十徒二年半至配所折責三十五板陳銓王玉祥均供母老丁單是否屬實並請飭查取結核辦快役扈衛不慎遺受人支更應與並不小心巡查監獄之責大張五營兵郝自富趙光輝龐榮王進寶李進貴均照不應

之外實在盜犯共有首夥四名該縣於疎防限內
僅自行拏獲夥盜劉兌兒一名尙有盜首徐二及
按毆事主之馬輩兒等未獲仍應開叅疎防應俟
飭取職名另行叅辦全案供招咨部並咨明順天
府尹查照謹

奏奉

硃批刑部議奏

道光六年十一月二十九日

奏爲京外拏獲迭劫巨盜審明定擬事前據署東路
同知羅秉寅稟報飭差兵役協同薊州香河等州

縣捕役緝獲盜犯張三禿子盧順潘五賊犯程三
李添淮窩主藍老並據三河縣拏獲賊犯于老寶
坻縣拏獲賊犯王七香河縣拏獲窩主闕明等共
九名先後解廳訊據各犯供認因竊行強四案拒
捕三案竊案十三案該廳因案關重大押犯來省
聽候委員案辦等情當經行司飭委保定府審辦
在案旋准刑部咨開欽奉

諭旨刑部奏審訊竊劫盜犯朱得才等一案已據供認
行竊十三次臨時行強四次除所供夥竊張四段忠
等二案業經該部傳同事主質訊外其餘竊劫各案

事主均在直隸各州縣未便紛紛提質恐窩夥尙不止此數人竊劫亦不止此數案罪關生死出入必須根究明確以成信讞且現據該犯等供出之薊州捕役魯希武香河縣革捕樂大楞得贓故縱指引行強尤爲案內要證其逸犯陳喜亦未弋獲著將宋得才孫祿李三徐亮俱解交直隸總督分飭各州縣逐案傳集事主並嚴拏捕役魯希武革捕樂大楞及逸犯陳喜等務獲提同現犯嚴訊明確按律定擬具奏東城副指揮劉啟元揀發指揮畢以齡拏獲京外盜犯多名著交吏部照例辦理餘依議欽此○行到臣並

將宋得才孫祿李三徐亮及薊州拏獲之王瞎子
先後提解來省臣查宋得才等供認各案與署東
路同知羅秉寅等拏獲盜犯張三禿子等供認劫
竊各案均有牽涉復經行司飭發保定府歸案審
辦一面委員查拏魯希武等解審嗣據委員會同
薊州查明魯希武早因悞卯斥革樂大楞係魯希
武名下散役並非香河縣革捕已於四年間病故
將魯希武解省發交保定府提犯質訊因魯希武
於嘉慶二十二年間誘同李三有行竊薊州事主
吳景促家衣飾之案將其拏獲送官李三因而挾

嫌串通宋得才等在部妄扳等語當據詳明先行
省釋旋據東路同知辛文祉查明先經拏獲之陳
奎卽係宋得才等在部供出之夥盜陳喜與續獲
賊犯楊七一併解省飭審去後茲據保定府知府
金洙審明定擬由司覆審招解前來臣親提研鞫
緣宋得才籍隸薊州張三禿子籍隸香河縣與現
獲薊州人孫祿潘五陳奎卽陳喜並失於嘉慶二
十二年犯竊賁刺保釋之李三香河縣人盧順闕
明程三楊七李添淮遵化州人徐亮並已獲病故
之薊州人王昭子藍老三河縣人于老並未獲之

賓坻縣人呂二薊州人陳玉魁李四王隴三河縣人陳十並京東不知何州縣人傻楊劉七張二劉二互相認識道光五年三月初九日張三禿子孫祿潘五盧順並在逃之傻楊劉七先後至藍老家會遇道及貧難盧順起意行竊張三禿子等允從是夜二更藍老在家等候張三禿子孫祿盧順劉七分攜繩鞭等械潘五傻楊徒手同夥六人卽由藍老家起身偕至香河縣孤辛莊事主佟守貴家牆外劉七扒牆下院開啟街門各犯一齊進內傻楊劉七在院接賊孫祿盧順掇窗進屋開啟房門

張三禿子潘五進屋接賊事主驚覺喊嚷潘五起
意行強接過張三禿子繩鞭嚇禁孫祿盧順搜得
衣飾錢物與張三禿子等分攜逃回藍老家內俵
分各散此卽孫祿在部供認行劫香河縣谷辛莊
不記姓名事主一案又是月二十五日孫祿盧順
偕至張三禿子家閒遊張三禿子因問明告知香
河縣灣屯村劉張氏家道豐裕囑伊糾竊隨轉邀
孫祿盧順同赴闕明家內欲其引路問明因與劉
張氏鄰村居住恐被識破未經同往將劉張氏家
住處向張三禿子等指明是夜二更張三禿子孫

祿盧順分攜繩鞭等械同夥三人由闕明家起身
同至事主劉張氏門首張三禿子撥開街門與孫
祿盧順一齊進院事主驚覺喊嚷孫祿起意行強
解寬進內房啟屋門盧順在院接賊張三禿子入
室掠奪衣飾等物出院復順取鐵鋤一同還闕
明家內並未告知行強情由將贓俵分而散此即
孫祿在部供認行劫香河縣灣屯鎮劉姓一案又
四月初二日朱得才徐亮並在逃之李四先後至
李三家會遇朱得才起意行竊徐亮等允從李三
患瘡未經同行是夜三更徐亮李四分攜小刀木

棍宋得才徒手由李三家起身路經薊州徐亮復邀允王瞎子暨在逃之王隴前往接賊同夥五人偕至寶坻縣小徐各莊外王瞎子王隴在彼等候宋得才徐亮李四齊抵事主陳添倉家門首見街門虛掩一同推門進內陳添倉聽聞犬吠開啟二門出視宋得才起意行強與李四硬行進院徐亮在外等候陳添倉畏避入室關閉屋門宋得才拍門恐嚇陳添倉未敢聲張宋得才李四劫得驢頭雞隻而出徐亮王瞎子王隴回至李三家內將贓變賣得錢同雞隻均分食用此卽宋得才等在部

供認行劫寶坻縣小徐各莊陳添倉一案又四月二十四日朱得才孫祿徐亮陳奎卽陳喜並在逃之呂二先後至李三家會遇呂二起意行竊朱得才等允從是夜二更朱得才呂二李三分攜小刀等械餘俱徒手同夥六人復至寶坻縣事主陳添倉家房後徐亮李三在外看人呂二用小刀割開籬笆牆同朱得才孫祿陳奎進院事主知覺開啟後門出視呂二起意行強卽與朱得才孫祿硬行進屋陳奎在院等候事主開啟前門喊嚷徐亮李三聞聲畏懼先自逃回呂二朱得才等搜得衣飾

等物仍由原路而出回至李三家內將贓當賣得
錢均分花用此卽朱得才等在部供認行劫寶坻
縣陳添倉一案又四月二十二日張三禿子潘五
程三楊七先後至盧順家會遇張三禿子起意行
竊盧順等允從是夜二更程三在盧順家等候張
三禿子潘五分攜繩鞭等械楊七盧順徒手同夥
四人偕至寶坻縣宜城莊事主馬士昌家牆外楊
七在外看人張三禿子上牆下院開啟街門潘五
盧順隨同進院張三禿子撥開屋門與潘五盧順
進屋男女事主一齊驚喊張三禿子起意行強當

將男事主按住並拳毆女事主兩下潘五搜得衣飾走出交與楊七先行攜回復進屋幫同盧順竊得錢文背負至盧順家內俵分而散楊七程三不知強情又五月初五日張三禿子潘五並在逃之陳玉魁先後在盧順家會遇張三禿子起意行竊潘五等允從是夜二更張三禿子潘五陳玉魁分攜繩鞭等械盧順徒手同夥四人偕至香河縣清寺莊事主劉智強家門首潘五在外看火張三禿子陳玉魁盧順撥門進院事主知覺出掠陳玉魁起意行強卽用繩鞭拒毆張三禿子等入室劫得

衣飾仍由原路而逃將賊俵分各散又道光五年三月初八日張三禿子孫祿盧順于老並在逃之陳十先後至藍若家會遇張三禿子起意行竊孫祿等允從是夜藍老在家等候張三禿子等同夥五人分攜繩鞭等械偕至三河縣大津莊事主韓起隴家門首扒牆下院開啟街門竊得騾驢經事主知覺出捕陳十起意拒捕用言嚇禁同張三禿子等仍回至藍老家住宿次日事主查知將騾驢牽回各散四月初一日張三禿子潘五盧順程三李添淮先後會遇張三禿子起意行竊潘五等允

從是夜張三禿子等同夥五人分攜繩鞭偕至遵化州新莊地方程三李添淮均在莊外等候張三禿子等齊抵事主王瑞亭家門首扒牆下院撥門入室竊得衣飾錢文而迎經事主知覺追捕張三禿子起意拒捕用言嚇退逃出莊外將賊捕至張三禿子家查點當錢與所竊錢文均分花用程三李添淮俱不知拒捕情由又四月二十八日子老並在逃之張三劉二先後會遇劉二起意行竊于老等允從是夜同夥三人分攜軟梯等械偕至三河縣南莊事主張鳳家牆外上牆下院開啟街門

于老劉二先竊得牛驢走出經事主知覺出捕張
二起意拒捕用繩鞭拒毆而逸將賊變賣得錢分
用統計該犯等在部供認行強四案在外又究出
行強二案拒捕三案共記九案又訊據程三供認
除聽從張三禿子等夥竊實坻縣事主馬士昌遵
化州事主王瑞亭不知強劫拒捕情由兩案外復
於道光五年五月十九日聽從張三禿子夥同潘
五盧順行竊香河縣高辛莊事主高添幅家鐵鍋
雞隻分別賣錢食用是年六月十六日程三與張
三禿子潘五先後至闕明家會遇聽從闕明夥同

張三禿子等行竊香河縣興隆莊事主杜慶元家衣服等物攜至閩明家窩藏陸續賣錢分用是月十九日程三聽從潘五夥同張三禿子行竊香河縣獨立莊事主劉連衡家衣褲當賣得錢分用七月二十日程三聽從潘五行竊寶坻縣鄒辛莊事主尹樊氏家驢頭賣錢分用共計程三聽從行竊六案臣恐此外另有劫竊別案窩家藍老等有同行上盜情事復親提各犯逐細研鞫各供矢口不移案無遁飾查律載共謀爲竊臨時行強以強盜論又強盜已行而但得財者不分首從皆斬又例

載盜劫之案各督撫嚴行究審將法所難宥及情有可原者一一於疏內聲明大學士會同三法司詳議將法所難宥者正法情有可原者發新疆給官兵爲奴又道光六年奏准新例窩藏窩盜五名以上者發雲貴兩廣極邊烟瘴充軍又行竊初犯結夥已有四名並持兇器刀械計贓科罪止擬杖者於責刺後加繫鐵杆一枝定限一年釋放又初犯之賊被糾迭竊六次同時並發者照積匪猾賊例量減一等擬以滿徒又律載竊盜贓一十兩杖八十三兩杖九十各等語此案來得才張三禿

子等迭竊事主佟守貴陳添倉等家臨時行強劫
得衣飾騾驢等物及嚇禁事主共計九案各供上
盜情形劫竊年月日期悉與各事主報案相符賊
有起獲正盜無疑自應按律問擬宋得才張三禿
子孫祿盧順潘五徐亮陳奎卽陳喜等七犯除疊
竊拒捕各案輕罪不議外均合依其謀爲竊臨時
行強以強盜論強盜已行而但得財者不分首從
皆斬律擬斬立決宋得才張三禿子孫祿盧順潘
五等五犯均行劫二次以上係屬法所難宥徐亮
聽從宋得才行竊陳添倉家二次一次在外接贓

一次不知強情陳奎卽陳喜聽從宋得才行劫陳
添倉家一次僅止在外接贓均屬情有可原相應
聲明聽候會議藍老闕明李三窩留張三禿子朱
得才等行竊據供不知強情第窩竊俱在五名以
上亦應按例問擬藍老闕明李三等三犯均合依
窩藏竊盜五名以上發雲貴兩廣極邊烟瘴充軍
例應發雲貴兩廣極邊烟瘴充軍仍以極邊四千
里爲限至配所杖一百折責四十板藍老在監病
故應毋庸議程三聽從張三禿子等行竊馬士昌
等家兩案不知強劫拒捕情由自應仍按竊盜本

律問擬該犯另有聽從夥竊四案核之查到鞫案
並與張三禿子等質究無異共計被糾迭竊六次
亦應按律問擬程三除行竊計贓輕罪不議外合
依初犯之賊被糾迭竊六次同時並發者照積匪
獨賊量減一等擬以滿徒例應杖一百徒三年至
配所折責四十板仍繫帶鐵杆一枝俟限滿開放
遞籍楊七據供行竊二案惟聽從張三禿子等行
竊馬士昌家計贓三十兩爲重李添淮聽從張三
禿子等行竊王瑞亭家計贓二十兩容均明不
知強劫拒捕情事自應各照竊盜不律問擬楊七

合依竊盜贓三十兩杖九十律爲從減一等杖八十折責三十板李添淮合依竊盜贓二十兩杖八十律爲從減一等杖七十折責二十五板係初犯照例在於該犯等右小臂上各刺竊盜二字該犯等聽從夥竊各案俱結夥四名以上持有器械應遵照新例各加繫鐵杆一枝定限一年釋放王瞎子于老聽從行竊均干例擬業已在監病故應毋庸議王七訊止指引宋得才等行竊竄抵縣事主韓喜元家騾驢一案計贓八兩零與宋得才等劫案無涉應發回該縣另行擬詳完結薊州革役魯

希武訊無得贓故縱情事應與並無指引行強情
事業經病故之樂大楞均無庸議已獲各贓給主
認領未獲各贓同當本錢文在於各犯等家屬名
下著追分別給主還商逸犯呂二等嚴飭勒緝務
獲究辦香河等縣事主佟守貴等被賊行強拒捕
各案現雖獲盜及半第係他人捕得或獲犯已在
限外且有盜首在逃仍應開叅議處東城副指揮
劉啟元揀發指揮畢以齡拏獲盜犯宋得才孫祿
二名窩主李三一名相應聲明聽候部議前署東
路同知候補同知羅秉寅破獲盜犯多名業經前

督臣 蔣攸銛奏奉

諭旨遇有相當同知缺出酌量補用現已奏補廣平府同知毋庸再請鼓勵供招咨部並飭司查取各州縣應議職名另行核辦謹

奏奉

硃批刑部速議具奏

道光七年二月十六日

奏爲裁減捕盜弁兵添設捕役以收實效而節經費事竊照順天府屬之四路同知管轄捕盜弁兵始於康熙二十七年嗣後裁改增添現存千把外委

兵丁三百八十員名馬二百三十六匹歲支俸餉
馬乾公費紅白賞等銀一萬三千八百八十餘兩
此項弁兵向不操演旣無護送餉鞘人犯差使亦
無武職大員統轄緣當日四路廳本係捕盜同知
其時近京地面響馬巨盜劫掠頻聞是以專設四
路捕盜同知責令帶兵緝捕兵丁亦予以馬力俾
可周歷窮追迨雍正年間臺臣黃祐條議請裁四
路弁兵歸營管理經前督臣會同提臣核議以彼
時響馬多已斂跡酌裁馬數十匹其餘馬匹弁兵
照舊存留近屆百年今昔情形又復迥異溯自乾

隆三十年間將順天府屬州縣刑錢案件歸四路同知核轉地方事務較繁責任又重於督緝而各弁兵分列於二十四州縣遠設汛防該同知縱欲認真考察亦苦於鞭長莫及該兵丁無文武大員統轄僅恃千把外委等弁分汛管束於叅賊通盜及缺額冒餉等弊不能保其必無與其虛糜餉銀不得實濟莫若量爲裁改應請

旨將四路同知原設捕盜弁兵各存留把總一員例馬二匹經制外委一員額外外委一員各官馬一匹馬兵二十名官馬二十匹並留戰兵十名共馬步

官兵三十三員名合之四路同知各額設馬快十二名步快八名統計緝捕兵役各五十三員名均責令該同知督率巡緝京營交界地面以佐五城捕務所不及其弁兵勤惰由該同知隨時查考仍每季由通永霸昌二道各就所轄考驗一次年終呈送順天府府尹考驗一次如有緝捕勤奮者分別記功獎賞陞拔其有承緝案件逾期不獲者於冊內聲明聽候分別責革如此明定章程則兵雖減而捕務轉歸核實統計存留弁兵馬匹歲需俸餉公費紅白賞銀五千四百五十餘兩遇閏加增

其餘千把外委額外等弁及兵丁馬匹悉行裁汰
惟是四路同知旣各有弁兵快役五十三員名專
司巡緝京營交界地面其二十四州縣緝捕事宜
自應專責州縣經理第大宛兩縣止額設馬快各
十二名其餘州縣各止八名爲數太少不敷巡緝
必須分別增添應請將大缺之大宛等十六州縣
每處各添馬快八名中小缺之懷柔等八縣每處
各添馬快六名共一百七十六名每名一歲例支
工食並草料銀十六兩八錢計需銀二千九百五
十六兩八銀卽於所裁弁兵俸餉馬乾銀內撥給

如此一轉移間兵捕均有管束之官不致有名無實洵與近京捕務更爲周密並可節省銀五千四百五十餘兩一歲計之不爲多經久則數不少庶因事制宜省無益之虛糜可循名而責實其應行裁添事宜俟奉有

諭旨後另行核議分別咨

題是否有當謹合詞具奏謹

奏奉

硃批兵部議奏

容安謹按此奏經戶兵二部議准得

旨依議

道光七年六月十三日

奏爲賊匪拒傷未奉官票之捕役並捕役擅傷罪人酌擬加減治罪專條具奏事竊查律載犯罪事發在逃官司差人追捕有拒捕者各於本罪上加二等罪止杖一百流三千里毆所捕人至折傷以上者絞監候殺所捕人者斬監候又例載罪人拒捕如毆所捕人至殘廢篤疾罪在滿徒以上者方依律擬絞監候其但係刃傷及折傷以下仍照律加本罪二等又犯罪事發官司差人持票拒捕如有

拒殺差役者爲首擬斬立決爲從謀殺加功及毆
殺下手傷重至死者絞立決毆殺幫同下手者絞
監候若案內因事牽連奉票傳喚以及別項罪人
拒捕均仍照拒捕追攝各本律本例科斷如差役
非奉官票或雖經奉票而有藉差嚇詐凌虐罪犯
情事致被毆死者各照平人謀故圖殺本律定擬
均不得以拒捕殺人論又官司勾攝罪人一時爭
鬪拒毆致有殺傷仍照各本律定擬其非本案罪
犯及非所勾捕之人無論在途在家俱以凡鬪論
各等語細譯例意罪犯之拒捕與差役之勾攝總

以奉票不奉票爲定罪之區別誠以役旣奉票則所勾捕者本爲票內應拏之犯是其事已發覺罪狀已明在官役得以持票拴捕而在本犯卽應俯首就拘如有逞兇拒殺差役卽應照例擬以斬決卽係別項罪人亦應仍照拒捕本律擬斬監候若差役非奉官票則所指拏者原非本案應拏之人是其事未發覺罪狀未明在差役見而拴拏不過因其跡涉可疑或爲圖詐起見以致互有殺傷例應各照平人謀故鬪殺傷科斷不得以拒捕殺傷人定擬者蓋恐其差役專制之權而杜其擅殺之

漸也定例本有深意援引各有專條是以向來遇有竊盜罪人殺傷非奉官票指拏之捕役均照凡鬪殺傷科罪厯經遵辦在案特是按律定罪輕重自有權衡而因時制宜寬嚴尤期互濟查直隸爲畿輔重地界連豫東近年賊盜之案頗多臣每以弭盜安民爲念上年曾經奏請酌改盜賊窩主治罪條例並酌定兵役包庇窩主專條各地方官頗能留心整飭捕役亦漸知畏法勒於緝捕而近來賊匪尙多兼有拒傷差役之案推原其故蓋由差役非奉官票指拏遇有殺傷等事均照平人謀故鬪

殺問擬以致賊匪肆意橫行毫無顧忌公然與差役抗衡而差役因無官票卽不敢盤詰拘拏彼此各存己私則賊犯易於遠颺官役得所藉口實不足以靖絕盜風自應將成例稍爲變通以示懲創惟是改照罪人拒捕科罪如毆所捕人至殘廢篤疾罪在滿徒以上卽應擬絞殺所捕人卽應擬斬不特過於從嚴且究與實在奉票差捕抗拒殺傷者無所區別臣悉心酌議除差役藉差嚇詐凌虐致有拒殺情事仍照向例辦理外應請嗣後搶竊罪人凡遇非奉官票指拏之差役見其形跡可疑

向賊盤詰欲行送官如有逞兇不服拒毆差役傷者無論杖笞並毆至殘廢篤疾均於應得凡鬪及行竊本罪上酌加二等定擬至死仍各依謀故鬪殺本律問擬其有行竊迥貫並另犯重情仍從其重者論如差役擅傷罪人除毆非折傷勿論外如毆至折傷以上亦照凡鬪遞減二等科斷死者並依凡論其罪人持仗拒捕被捕者格殺照律勿論庶賊匪知所儆戒差役無所顧慮而於戢暴之中仍寓權衡之道臣管見所及是否有當伏乞

皇上聖鑒勅部議覆謹

奏奉

硃批刑部議奏

客安謹案此奏經刑部議准得

旨依議

道光九年九月初七日

奏爲續獲聽從季丙寅奪犯殺傷兵役案內從犯審
擬具奏事竊照開州逸盜季丙寅糾衆奪犯殺傷
兵役一案前經拏獲季柱等並另案窩盜各犯三
十餘名旋又續獲鄭奉年等八名並准甘肅省獲
解宋毛三梁振清二犯均經前護督臣唐之申審

明定擬先後奏奉

諭旨飭部核覆在案茲據開州知州張良志稟報飭役
躡至河南淮寧縣地方協同營兵並淮寧縣差役
拏獲逸犯齊勇解省飭發保定府知府審明定擬
由司覆審解勘前來臣因公出奏明飭委藩司顏
伯燾提犯覆加研鞫緣齊勇籍隸山東曹縣與季
丙寅交好並未同夥爲匪道光八年六月初二日
開州知州張良志會營拏獲季丙寅堂弟另案盜
犯季考押解回州季丙寅因恐究出夥劫各案起
意奪犯自邀孔密黑等並囑其弟季柱季四分邀

該犯齊勇及宋毛三等共計三十一人各持器械趕至保安集季丙寅因見兵丁陳魁等在舖喫飯意料季考必在舖內卽與宋毛三梁振清季柱孔霍黑馬俊梁石滾孔和尚鄭奉年苗法清十人一擁進舖用槍扎傷兵丁陳魁劉臣王典三人倒地時齊勇與孔五成馬梁石馬士玉韓黑閻貴朱五郝士興崔二牛在街助勢該州等督率兵役出向追捕季丙寅等逃至高梁地內復將追捕之兵役甘清源郭萬得李玉成拒扎多傷甘清源郭萬得二人倒地宋毛三復接過齊勇鳥鎗放倒李玉成

與陳魁等均因傷身死各犯遂卽逃散嗣據開州等處並甘肅省先後緝獲季柱等節經審明擬結而齊勇逃後潛赴河南太康縣與王通義合夥販猪並至淮寧縣張連家住攸銷賣王通義等並不
知齊勇犯案脫逃旋被該州張良志訪知派役前往協同汛兵及淮寧等處差役將該犯拏獲解省
審據供認前情不諱案無遁飾應將現犯先行擬
結查例載官司差人捕獲罪人有聚衆中途打奪
毆差致死爲從隨同拒捕未經毆人成傷之犯改
發極邊足四千里充軍等語此案齊勇聽從季丙

寅等糾邀奪犯雖未傷人惟目擊季丙寅等逞兇
殺差在場助勢殊屬不法自應按例問擬齊勇合
依中途打奪毆差致死案內爲從隨同拒捕未經
毆人成傷之犯改發極邊足四千里充軍例應發
極邊足四千里充軍至配所杖一百折責四十板
其所供親老丁單照例不准留養王通義張連訊
非知情合夥容留應毋庸議並將供招咨部仍飭
嚴緝盜首季丙寅務獲究辦謹

奏奉

硃批刑部議奏

道光九年十月初二日

奏開州逸盜季丙寅日久未獲該州張良志不惜盤
費分遣明幹丁役馳赴各省躡緝前據派往丁役
在河南柘城地方會同縣役指認拏獲季丙一犯
究出季丙寅逃往汝寧府一帶隱匿該丁役旋卽
分投偵緝於九月十三日匯至新蔡縣境內適該
處盤獲形跡可疑數人該丁役上前辨認確有季
丙寅在內當卽指交該縣拏解河南省城等情具
稟前來仍咨河南撫臣迅卽提訊明確解直歸案
審辦謹

奏奉

硃批知道了務要辨認明確

道光九年十一月二十六日

奏爲審明拏獲奪犯殺傷兵役首犯季丙寅及夥犯
季四分別辦理恭摺具奏事竊照開州知州張良
志會營拏獲盜犯季考回至中途被季丙寅糾衆
奪犯未成殺傷兵役一案當經前護督臣屠之申
派委前署臬司陶樑馳往督辦將疎脫首犯之地
方文武各官先行摘去頂戴奏奉

諭旨飭令嚴緝先據該州張良志拏獲得賊包庇等語

之屠繼光等追究各犯逃匿踪跡選派兵役分赴河南山東安徽甘肅等省並在本境及鄰封州縣節次拏獲案內夥犯季桂等二十七名究出各省積年盜案十起並另獲首夥盜竊多名經護督臣屠之申以獲犯人數較多應審明分案議擬以清眉目將奪犯本案而又曾犯扒城行劫之季桂馬俊孔竊黑宋毛三鄭奉年間擬斬梟梁石滾孔和尙梁振清苗法清俱擬斬決餘犯分別問擬斬軍徒其另獲劫竊各犯史添桂等亦分別問擬斬軍斬決及軍流徒杖俱經前護督臣屠之申暨臣先後

奏結在案惟首犯季丙寅並其弟季四在逃未獲
迭經懸賞嚴飭勒緝務獲毋許鬆懈臣於七月內
風聞季丙寅有逃回之信隨密派休致都司李士
剛前往捕緝茲該州張良志會營並李士剛派出
丁役在於河南柘城地方先獲季四一犯究出季
丙寅逃往汝寧府一帶藏匿該丁役等旋即帶同
眼線分投偵緝於九月十三日躡至新蔡縣境內
適該處盤獲形跡可疑數人經李士剛帶同該丁
役等上前辨認確有季丙寅在內指交該縣解
河南省城臣接據稟報一面附片奏

聞一面飛咨河南撫

臣

並委員迎提該犯等來直飭據

保定府知府張範東督同委員于牙河通判鄭琦

候補知縣申寶泉汪玉海審明定擬由司覆審解

勘前來

臣

提犯覆加研鞫緣季丙寅與弟季四籍

隸開州該州界連豫東季丙寅恃居遠距州城七

十餘里之北遊店地方不時出沒赴山東河南等

處爲匪於本境則並未滋擾該犯與已獲擬結之

聶三史添良孫成夏二景郭樸李大麻子張從貴

馬新春梁元李景史添柱宋方牛七宋毛三鄭奉

年馬俊苗法清梁振清梁石滾孔審黑孔和尚宋

羣閭賈崔二牛崔三牛高明清劉新章齊勇單喜
李二麻韓黑米二馬遂季雙居孔五成馬梁石馬
士玉馬孟元小李二麻郝士興另案投首之李第
五未獲之董第四王金鳳楊十一李六均各熟識
互相勾結往來劫竊嘉慶二十五年八月二十六
日季丙寅與聶三孫成董第四過道貧難聶三起
意行劫同夥五人是夜行至河南汜水縣城外砍
取道旁樹株紮成軟梯越牆進城偕抵事主林萬
清糧食舖門首季丙寅史添良在外把風聶三孫
成董第四躡梯進院季丙寅聽聞事主在內喊叫

聶三用言嚇禁劫得銀錢衣物開門同季丙寅等
仍由原路越城將各賊俵分花用又道光元年三
月初三日季丙寅與夏二景聶三史添良孫成會
遇季丙寅起意行劫同夥五人晝夜行至山東寧
陽縣城外用梯扒城偕抵事主杜東瑞盛錢舖門
首史添良孫成在外把風季丙寅夏二景聶三躡
梯進院點燃蠟捻舖夥李添興驚覺出捕季丙寅
用棍拒傷其顙門左手腕右手指左腳腕倒地與
夏二景聶三撞門進屋又經舖夥郭九瑞喊阻亦
被夏二景用棍拒傷並拔出壁上所挂腰刀嚇禁

聲張搜得銀錢開門同逃出城分贓花用又是年
十月初二日季丙寅聽從史添良並邀同夏二景
郭樸李大麻子同夥五人卽於是夜至河南鄆城
縣仍扒城偕至東街事主潘得月錢舖門首豎梯
入院夏二景郭樸在院接贓季丙寅與史添良李
大麻子撬窗進屋竊得銀衣分攜開門從原路扒
出城外俵分花用又十月二十八日季丙寅與夏
二景李大麻子郭樸孫成李第五行至直隸樂城
縣治河舖地方夏二景起意行竊同夥六人是夜
偕至事主李金玉錢舖屋後季丙寅夏二景豎梯

進院孫成在外等候舖夥安舒山驚覺聲喊李儒宗亦開門出捕夏二景起意行強用棍將安舒山拒傷郭樸上房瞭望李大麻子李第五在窗內窗屋內又有事主張安太用槍從窗內向外亂扎致傷李第五額顱李第五用手奪住將槍桿折斷乘勢砸開窗戶進內季丙寅夏二景拒傷張安太同李大麻子劫得銀錢從大門逃逸分贖花用又六年三月初四日季丙寅糾允馬倭聚毛三牛七苗法清行劫同夥五人行至河南魯山縣二郎廟村三更時分進村倩抵事主趙五鎖舖堅梯上房

下院牛七在院把風季丙寅宋毛三用身撞開舖
房後門擊斃油捻與馬俊苗法清四人進屋舖夥
張誠宋壽驚喊馬俊卽將張誠等拒傷苗法清在
外接賊宋毛三復撞開房門同季丙寅馬俊進內
又經舖夥謝俊山及趙瑚之子趙澍元喊嚷宋毛
三先用棍將謝俊山拒傷嚇禁並持刀向趙澍元
逼令告知藏銀處所搜得銀錢衣物遞交苗法清
等接收趙瑚趕出喊捕亦被宋毛三用棍拒傷開
門逃逸分贓花用又七年二月十七日季丙寅復
起意邀允夏二景張從貴季考梁元馬新春李景

主金源出外行劫同夥八人於二十九日四更時
分偕至山東汶上縣李景扒梯跌傷未經入城季
丙寅七人豎立軟梯進城至事主雷子餘錢鋪門
首躡梯上房下院張從貴梁元馬新春王金源在
院把風接賊季丙寅用身帶鐵斧砸開窗戶與夏
二景季考入室鋪夥郭萬慶驚起攔阻被季丙寅
用棍拒傷其左胳膊右手背右膝並取屋內防夜
鐵槍扎傷其左肱肘季考亦用棍將鋪夥李永增
拒傷季丙寅砸開櫃鎖搜得銀兩遞交張從貴等
分攜躡梯出城俵分花用又七年九月不計日期

季丙寅糾允史添柱孔和尚鄭奉年宋毛三梁振
清宋方出外行劫同夥七人於十月初八日夜行
至安徽潛山縣豎立軟梯扒入城內偕抵事主余
長泰錢舖門首孔和尚梁振清宋方在外接贓季
丙寅史添柱鄭奉年用石塊撞開舖門宋毛三點
燃油捻一同進舖事主余長泰驚覺起捕季丙寅
持刀嚇禁史添柱等砸破櫃蓋劫得銀錢衣服遞
交孔和尚等接收由原路扒越出城俵分花用八
年六月初一日該州知州張良志訪問季丙寅等
業已潛回會同都司平保千總高振德各帶兵役

連夜前往掩捕次早到彼季丙寅先已逃匿將季
考馬遂王虎拏獲維時季丙寅亦恐被拏執持繩鞭
趕出因被兵役追捕逃至武生王士選家卽從後
牆逸去該州於季丙寅家搜獲鐵礮鳥鎗等物押
犯回州行至保安集地方該州張良志等押犯進
街兵丁陳魁劉臣王典張仁遠支俊郭殿魁郭金
鐸等七人在村頭小舖喫飯詎季丙寅聞季考被
拏慮恐究出行劫各案起意糾衆奪犯當卽糾允
孔霍黑孔和尚梁振清苗法清朱羣閻貴季雙居
崔二牛崔三牛高明清孔五成楊十一並囑其弟

季柱轉糾馬俊宋毛三鄭奉年梁石滾劉新章齊
勇馬梁石馬士玉馬孟元又囑其弟卽現在續獲
之季四轉邀單喜李二麻韓黑朱五小李二麻郝
士興季六連季丙寅一共三十一人各持刀鎗木
桿齊勇楊十一各攜鳥鎗由小路追趕小李二麻
崔三牛高明清行走落後季丙寅等趕至保定集
瞥見兵役在舖食飯季丙寅意料季考等必在舖
內卽與季柱孔窖黑馬俊鄭奉年梁石滾孔和尚
宋三毛苗法清梁振清十人一擁進舖餘犯在後
助勢該兵丁等不及攜取器械陳魁劉重王典三

人急舉桌橙抵禦被季丙寅等持槍亂扎均各受傷倒地張仁遠支俊郭殿魁郭金鐸四人乘空先走亦被季四與宋羣等在外用槍亂扎季四僅扎一下張仁遠等受傷尙不甚重均各遠避時有民人王海程羣在彼趕集亦被扎傷跑避因人多手襍何人扎傷何處均未看清該州張良志在街聞知派撥兵役將季考等管押先行會同營員平保高派德帶領兵役趕往追捕季丙寅尋找季考不在舖內與季柱等出見官兵追至卽竄入高粱地內兵丁甘清源州役郭萬得追近捉拏被該犯等

回身亂扎倒地兵丁李玉成亦被扎傷仍復喊捕
時齊勇楊十一宋毛三梁振清均匿高粱深處季
丙寅望見宋毛三接過齊勇烏鎗暗放中傷李玉
成倒地各散兵丁李玉成陳魁受傷後業已身死
並丁役甘清源等所受各傷俱經該州驗明稟經
前護督臣屠之申以案關盜賊糾衆奪犯拒捕殺
傷兵役情節重大飭委前署臬司陶樑馳往督辦
兵丁王典劉臣甘清源州役郭萬得亦俱先後因
傷身死其餘兵役民人傷均平復當將疎脫首犯
之地方文武各官先行摘去頂戴奏奉

諭旨飭令嚴緝該州張良志時已獲有平日包庇容留
各犯之屠繼光等追究逃匿踪跡分赴豫東等省
並本境鄰邑節次拏獲案內夥犯李柱等二十七
名究出各省積年盜案十起並另獲首夥盜犯史
添柱等俱審明將奪犯本案及另獲盜竊各犯分
案問擬斬梟斬決及軍流徒杖先後奏結在案首
犯季丙寅於拒傷兵役後逃至伊舅祖金二瞎子
家住宿一夜卽邀同季四潛赴甘肅靖遠縣劉道
青家藏躲旋又逃至河南疊次改易名姓在各處
傭工求乞夜宿空廟並無一定住址九年八月二

十九日季四逃至柘城縣地方被李士剛及開州
兵役會同該縣緝役指認拏獲追究季丙寅下落
至九月十三日復在新蔡縣地方會同縣差將季
丙寅指認拏獲一併解直屢審供晰前情不諱臣
查季丙寅係著名盜犯與弟季四在逃年餘難保
無另有竊劫別案且該犯等奪犯殺差前獲季柱
等曾有同夥三十一人而外尙有不識姓名數人
不知何人糾邀之供今該犯等獲案據供仍止三
十一人亦恐不實不盡復向嚴加究詰據季丙寅
供稱伊逃至甘肅後本欲赴涇陽一帶行竊因聞

四處捕拏不敢復竊滋事其從前亦止竊劫七案
伊弟季四並未隨同出外行劫並據季四同供當
日糾衆毆差伊等與季柱並所邀孔審黑等實止
三十一人前獲季柱等供有不識姓名數人或係
將到場看視之人誤認妄供故皆未能指出姓氏
如果另有夥犯伊等現已獲案身犯重罪豈肯代
爲隱瞞矢口不移案無遁飾查律載強盜已行而
但得財者不分首從皆斬又例載扒城行劫罪應
斬決者加以梟示又官司差人捕獲罪人有聚衆
中途打奪毆差致死爲首者不論曾否下手擬斬

立決隨同拒捕未經毆人成傷之犯改發極邊足
四千里充軍各等語此案季內寅所供疊次行劫
月口上盜情形及糾衆奪犯殺差悉與歷次獲犯
審結各原案相符正盜無疑該犯除行竊郾城縣
事主潘得月錢舖一案其餘爲首爲從行劫六案
內聽從行劫汜水縣事主林萬清糧食舖一案係
在嘉慶二十五年八月二十七日

恩詔以前該犯在外把風罪止擬遣例得援免其

赦後起意行劫魯山縣事主趙瑚錢舖及聽從行竊藥
城縣事主李金玉錢舖臨時行強與糾衆奪犯殺

差爲首均罪止斬決惟起意扒城行劫寧陽汶上
潛山等縣錢鋪共三案均應斬決梟示應卽按律
定擬季丙寅除糾衆奪犯殺差並劫案罪止斬決
不議外合依強盜已行而但得財者不分首從皆
斬律係扒城行劫加以梟示例應擬斬立決梟示
該犯積年勾結匪徒在外竊劫巨累數載經該州
訪聞潛回會營往拏該犯輒敢聚衆打奪並傷兵
役民人六死七傷潛赴各省逃匿實屬兇惡不法
今旣被獲未便再事稽誅臣於審明後卽恭請

王命飭委臬司李振嵩臣標中軍海參將該犯季丙

寅綁匪曹正法照例梟示傳首犯事地方懸杆
示衆以昭炯戒季四訊無行劫情事其聽從季丙
寅糾衆奪犯用槍扎傷兵役並誤扎路過民人致
傷若照本例問擬罪止極邊充軍惟該犯先聞季
考被拏卽持繩鞭出拒後復聽從季丙寅輾轉糾
人奪犯弟兄濟惡以致殺傷兵役多人自應酌量
加重問擬季四應於聚衆中途打奪毆差致死隨
同拒捕未經毆人成傷改發極邊足四千里充軍
罪上加重擬發新疆給官兵爲奴遇

赦不准援減該犯尙有夥竊各案另行查辦王士選訊

無故縱季四情事應免置議金二瞎子等前已擬
結亦毋庸議兵丁陳魁王典劉臣甘清源李玉成
州役郭萬得六名被犯拒傷身死創無賞卹但該
兵役等究因捕盜受傷斃命飭令該州酌量捐賞
傳屬給領逸犯楊十一等飭緝獲日另結再開州
知州張良志開州營都司平保千總高振德前因
犯無弋獲奏明先行摘去頂戴着令緝拏旋據該
州等協同各省先後緝獲奪犯案內季柱等二十
七名又究獲行劫各省另案盜犯史添柱等八名
現又同豫省將首犯季丙寅並季四拏獲究辦

通案 止罪應擬軍之楊十一李六二名未獲緝

捕尙屬奮勉開州知州張良志業經 奏奉

上諭開復頂戴其開州營都司平保千總高振德亦懇

恩施賞還頂戴以示鼓勵原叅承緝督協緝及兼轄文

武各員處分併請寬免並招供咨部謹

奏奉

硃批刑部議奏

那文毅公二任直隸總督奏議卷六十九